

paroles, se prosterne en terre, presente ses espauls nuës, & reçoit à l'instant ce qu'il demandoit avec ferueur. Le lendemain il s'en retourne dans son canot à Sillery d'où il estoit party. Enfin celuy qui attendit le dernier fut le mieux payé: ce fut tout à dessein qu'il laissa passer les autres devant luy, & qu'il choisit le dernier rang, afin de faire sa penitence plus à son aise & avec plus de confusion. C'est à moy, dit ce braue champion de IESVS-CHRIST, c'est à moy à payer à mon tour, ie suis le plus meschant, il faut que ie fois plus châtié que les autres, ie suis le plus criminel ie veux estre le plus mocqué. Frappez sur moy hardiment, dit-il à celuy qui tenoit la discipline, tandis que ie me pourmeneray dans l'Eglise pour boire la confusion & pour estre l'opprobre du monde; aussi-tost dit aussi-tost fait, il se promene le mieux qu'il peut par la Chappelle, & l'autre le fuit tousiours [46] frappant & flagellant, à chaque coup qu'on luy donnoit il disoit des paroles qui faisoient quasi fondre en larmes toute l'assistance. Je vous supplie, Seigneur, que ce que ie sens maintenant sur ma chair par les coups de fouet que ie sens, effacent les pechez que i'ay escry mal à propos sur vostre liure. Seigneur, ayez pitié de ce pauvre homme, disoit-il vne autrefois, qui a merité l'Enfer, & qui vous demande pardon. Je vous abandonne mon corps & mon ame & vous promets de vous estre plus fidelle à l'aduenir moyennant vostre grace. Cette flagellation eust esté trop longue si le Pere n'y eust mis fin, qui les consola les voyant dans cet estat de penitence, & les affeura du pardon de leurs fautes si leurs cœurs respondoient à leurs parolles & à leurs actions; ils les aduertit qu'ils n'eussent plus à faire de penitence publique